

徽縣志卷之八

藝文志下

江河紀畧

國朝楊三辰知州

歲庚寅平西兵大舉入川預爲儲餉計糧憲董公周歷秦徽召買於徽成二州縣建置厥倉由東運者秦州清水秦安三州縣糧貯徽倉由西運者伏羌禮縣西河三縣糧貯成倉而秦州禮店兩衛所各隨東西路附運以貯統會而轉運於畧議法甚善成倉議格

未行惟徽倉告竣又計運船裝糧餉川放下挽上數
年間有觸礁而碎者有遇湍而沈者有被橫摧走無
踪者有被盜劫焚人船俱莫可問者除見在運船一
百一十隻計工料每隻價銀一十兩六錢議令總運
副戎梁公督造五十二號徽州督造五十八號余躬
歷河干督船戶商販獎勤儆惰以考其成起天門山
下乃嘉陵江源絕壁北向有石門如城門狀卽俗稱
鐵門後川云山之陽有黑水縣舊跡四圍多大木船

料於此取辦焉稍下爲瓦窰溝轉西爲屯田坪山麓
間土田平衍可耕有宋三吳將軍屯田舊跡下爲五
隻窰關峽險隘又下爲睡佛寺梵刹壯麗摺轉再西
始爲丁家堡有居民數十家往來祭江登舟處也向
北爲嚴洞灘灘側山腰一洞迺嚴姓修以避難者溯
流前進爲合河口河從北來驟與江會兩水合鬪波
濤洶湧北河上流徽東之永寧河也源發於秦一自
新店窰經百納峽入永寧是爲中股一自娘娘壩經

蘭柴廟歸入永寧是爲左股一自王家樓透出墨磊
山經高橋下河注於永寧是爲右股三水總匯永寧
浸成大河迺克載空舟下至合河口益以嘉陵江水
厥勢雖大暗石碁多僅可載半重舟稍前河西有水
老官廟舊跡因名老官灘南爲渡口水深而穩南崖
之陰多空隙可壘窠鵲鳥密集是爲老鵲窩對河北
岸爲雷神壩淵澄水安靠西南下交田家河口一源
發徽城東長峪溝由東關偏斜射直西與北來水合

流一處是謂左河襟一源發頁水河併凍青峽口銀
杏鋪射直西與東峪水會是謂右河襟迨過石家峽
樓子崖達於田家河其間流疾多石至此地平水寬
皆細沙矣沙黃流濁爲黃沙灘行二里許亂石半埋
半露中央僅一窄溜澎湃湍激舟子一步不敢放鬆
至此重載盡卸人皆岸行謂之搬灘其船又一行法
必轉頭向上用纜扯綴擦崖徐放直至對河緩水從
頭再裝前進沿江西岸名倉頭坪者坪在山巔地坦

而廣宋吳將軍曾因坪建倉對峙於南者爲雀嘴崖
山峯孤削形同雀嘴蜿蜒綿亘爲巾子山迺州城之
照山也形類巾子羣山仰承如百體之戴元首山陰
有廢縣名長舉者遺趾尙存山巔古蹟元帝廟明禮
部尙書胡濙奉使訪張三丰曾登其上留有題咏又
名鐵山詳載州志東爲姚家灣水頗平岸多腴地土
著多姚姓因以名灣連村有小河住有顯姓人因名
顯家河而金竹林灣許家壩又皆就中錯處之灘塢

也洊至剪子渠水兩岔合來緊窄多漩灘惡石當門
復有巨石蹲踞似虎少疎則船不保下此爲猴子灘
亂石碁布狀類羣猴舵師畧不加意舟每閣架致漏
近前名響灘子水淺石多激撞之聲彷彿雷吼又有
雙龍崖傳昔雙龍鬪於上土人就石壁刊二龍形以
祀至此俱舍船從石棚扁磴扳援捧扭而過出澗水
平登舟進爲蒸餅崖其形孤圓矗聳狀似蒸籠其石
層層如餅下爲四方灘各出細流有四歸此故名西

南爲大虞關明初設駐巡檢衙舍廨宇猶存挨關週
圍腴田宜綿計百畝餘昔爲巡檢贍地因官缺居民
多侵焉轉角多山緊束無路爲下關門西岸有山折
旋而上爲羅漢洞門邊有石高可數丈若從洞內掣
出者三寶莊嚴兩排六尊石像古甚左右石壁羅漢
小像千計內舊貯藏經全板今櫃雖存板僅十存五
六耳關門迤下驚濤微殺其灘爲泥窩子多泥少石
舟行坦易下達鷹嘴窰窰上山形彎曲下鉤狀如鷹

嘴過此爲鐵爐灘近灘山產鐵砂距數里爲仙人關
峽宋將吳玠吳璘破敵處也東巖石壁高濶排仙人
三面非塑非鑿眉目鬚髮踈秀可數有天然飄動之
致江流迅湍舟之難行更無踰於此者前爲墨磊石
在江心其色黑如墨疑堆疑砌遇有積雨衝突石輒
變更無定諳水性者因勢巧避方保無虞若拘故道
每爲所懼進爲鵲鵲崖崖高無際野鵲依棲灘水較
前易行傍江石岸有斷碑知爲長舉故縣舊基相連

爲撥馬灘昔長舉撥差馬於此地焉出口山勢稍展
西南半坡有洞有泉有聖像相傳爲藥水龍王經文
列其別號有疾者禱取其水飲之卽愈又祈雨取水
多應云靠南山溯洄北向爲大沙壩流水積沙進前
則汪洋浩瀚白水江也經英佑侯廟前北會小河口
合流西下英佑侯卽老官神也江流漸平亦漸深糧
船重載始得大行焉西經馬蹄灣下歷宜口直灌畧
陽城右宜口上流來自西河者源出嶓冢山經長道

川合岷水由六港至小川子達罝口來自階州者派
始白龍江歷陽岩合犀牛江直交罝口總注畧陽又
前白水江所稱小河口者源發徽境西北一自老白
山經立斗峪包家峽伏家鎮卽在河池縣有碑記唐
杜甫寓有祠在焉河沂上下栗亭川東南山脚注歸
徽南之打火店一自糜渚關經江洛鎮鄭家峽泥陽
川透橫川鎮折過山寨坡下併北來河總滙而入打
火店兩水旣合流亦甚巨灘險者舟不可行

徽山試院記

國朝學政武之亨

徽陽之有書院也創自明世宗朝先是學使者按隴
以西檄諸州邑士子就試南安旣緣幅幘遼濶閱歷
弗及得請臺使者攝其事然試事猶在南安及其後
以階文諸州邑裹糧躡蹻跋涉維艱遂創書院於徽
而臺使者每當試士時輒持斧至意誠善也我
朝定鼎尙仍其舊迨廵方罷舉而試士悉歸之學臣昔
之閱歷弗及者今且戴星不遑矣南安尙爾何有於

徽嗣又以諸州邑去南安遠甚於天水另立試場以
徽兩成三州邑附天水而階文附南安如故士益疲
當事者益瘁蓋數十年來莫之與易也不佞自前歲
躬膺簡擢提衡兩陝而鞏郡鄧君與徽牧郭君以及
階文兩成諸君以按徽請不佞方謂幅幘遼濶閱歷
弗及是懼拒弗許請之再弗許至三又勿許客冬校
試南安則親見階文州邑士子跋涉千里裹糧躡蹻
而來者之百舍重繭也且老者杖行病者輿載以求

驗不佞目擊心傷因識郭君前此之固請有成見矣
旣而郭君以公事至南安而見請益力言自天水入
漢道必由徽去州僅百三十里耳不佞卽爲之首肯
曰吾必不惜旬日之功百里之程而使諸士子跋涉
千里裹糧躡蹻歷此不堪之苦矣使階文業已至郡
姑令就試下次仍附徽棚其徽兩成三州邑則親臨
試焉郭君喜甚先馳歸辦試事不佞於歲暮來是邦
見郭君規畫井井措置咸宜卽書院一節自補葺舊

存大堂外其餘如後堂暨號房等俱捐俸率屬吏督
率新造絲毫不擾於民郭君可謂知政本矣夫爲政
之本務在教士而教之善惟在愛人郭君兼而行之
毋惑乎循良著績口碑載道也獨是不佞前此之弗
許者非好逸也蓋畏簡書而有所不遑也後此之亟
許者非好勞也蓋憫瑣見而有所不忍也今茲郭君
之喜卽不佞之喜非兩相阿前此不佞之不喜卽郭
君之不喜亦非兩相左也不佞與郭君舉屬從公起

見而喜與不喜又無論矣然則郭君書院之役基仍
舊而更新事雖因而實創俾後五州縣士子得悠游
絃誦以免夫跋涉千里裹糧躡蹻之勞者厥功豈淺
鮮哉爰就其事而爲文勒諸石以詔後世不佞與郭
君有同志者康熙三十五年歲次丙子春二月記

杜公祠記

知縣 牛運震

栗亭川拾遺祠者明御史潘公創建以祀唐詩人杜
甫子美者也昔唐中葉帝京凌夷垣城解散子美亦